



Johnny Habibe

Ora nos kier duna reconocemento na un hende cu ta merece, ta bon pa semper hacie ora e ta na bida pa asina e persona por disfruta su reconocemento na bida, awe nos kier duna un reconocemento na un gran locutor local di radio, un homber cu un voz inconfundibel y un gran carisma pa e trabao cu e ta haci cu amor pa su pueblo, mi ta permiti mi mes di a describi Sr. Johnny Habibe como e "Voz di oro di Aruba".

Den un entrevista cortico pero hopi interesante, Johnny a relata pa "On the Air" algun di su anecdotanan y tambe cual ta e secreto di su exito.

E ta tata di 3 princes kendenan e ta stima cu tur su alma y curazon y semper el a tuma forza y esperanza pa su gran amor pa su yiunan.

Johnny a nace na luna di Februari di aña 1954, pa loke for di antemano nos kier felicite ariba su

fecha natal y cu Dios dune hopi aña mas di bida y bendicion.

Johnny ta un profesional den e medio como locutor y periodista, el a percura pa siña bon e trabao pa realiza esaki cu excelencia tras di microphone, el a siña electronica, 5 aña di periodismo, tambe el a haci su preparacion como locutor na Mexico, Estados Unidos y Venezuela



LOTTO
PA DEPORTE

Na luna di Augustus di aña 1968, Johnny a duna su prome stap nan den radio na edad di 14 aña cu Radio Voz di Aruba, e tempo ey Sr. Edison Croes (q.e.p.d) a siña Johnny e trabao di radio y a dune tur apoyo pa desaroya su mes den e ramo.

Johnny a drenta den e programa "Club musical" di Sr. Edison Croes, un programa cu tabata wordo transmiti diadomingo atardi y e tabata conduci pa Sr. Fan fan Sanchez cu tabata un gran locutor di su epoca.

Tempo despues Sr. Rene "Louchi" Lourens (q.e.p.d) a acerca Johnny y a pidie pa pasa programa tur atardi na Voz di Aruba cual tabata yama "Discolandia", poco poco e programa a pasa musica mas varia y mas actual loke a bira un regla den casi tur emisora aki na Aruba.

Despues di Voz di Aruba, Johnny a bai cu Radio Kelkboom y despues el a bin bek na Voz di Aruba y na aña 1976, Sr. Albert Dievontaller a tuma contacto cune pa expone e proyecto yama: Radio Carina, proyecto cu Johnny a duna full su apoyo na Sr. Dievontaller y riba un 8 di december 1977 nan a cuminsa como Radio Carina "La maxima".

Tempo despues, Johnny a bai traha na Canal 90. Johnny a probecha e oportunidad pa felicitá gerencia y staff di Canal 90 y tambe gradici pa e respaldo y aprecio cu el a haya. Como profesional, Johnny ta considera cu un profesional semper mester tene cuenta for di unda el a bin, unda e ta y unda e ta sigui, sino e no por tin futuro profesional.

Na aña 1989 el a bira Sales director di Radio Carina y na aña 1991 a bira Director general di Radio Galactica, trabao cu el a eherce cu hopi amor y sacrificio.

Riba 11 di Februari 1993 Hit 94 a resona den aire como e emisora nobo di Aruba, e aña aki 2004, e emisora ta cumpli 11 aña di existencia na loke Johnny a probecha pa gradici e apoyo grandi di su oyentenan y tambe di su clientenan cu a deposita nan confianza den e excelencia y calidad di Hit 94 y despues na 1996 a pone Mega 88 cu awe tambe ta destaca den tecnologia, musica y programacion.

Nos a pidi Johnny pa describi e caracteristicanan di un bon locutor di radio.

Locucion ta un arte, e arte di papia. Un bon locutor mester tin potencia den su voz, firme y fuerte, bon diccion (bon conocimiento di palabranan), un bon locutor mester tin desaroyo general y principalmente carisma of sea cu e voz ta agradabel na oido, un voz cu por caricia e oido di oyente pero mes importante cu esaki ta e bon desaroyo general, sin esaki; ta preferibel pa simplemente e DJ anuncia e disco so y purba papia lo menos posibel.

Nos a puntra Johnny cual ta e clave di su exito na radio y el a contesta:

Cu tur mainta e ta lanta dunando danki na Dios pa tur e bendicionnan cu el a ricibi, y ta ricibi tur dia y haci e trabao aki cu humildad y amor.

Un locutor mester tin e conviccion cu e mester sirbi comunidad y no comunidad sirbi e, no ta bon pa blof na radio cu un of otro ta mihor cu otro of yama su mes e mihor locutor di Aruba ya cu cada locutor profesional tin su parti especial, su estilo particular cu ta distingui su mes for di otronan.

Kizas e pensamiento of conseho mas importante cu Johnny kier a comparti cu nos ta lo siguiente: "...Wak semper for di unda bo ta bin, unda bo ta y unda bo kier sigui!..."



Happy
Valentine's Day

Secrets of Aruba is located in Seaport Mall
Opening hours 9.30am - 6pm nonstop.

Tel.: 583 0897